

Yommuu Soda fi Rakkoon Cimu-Kutaa 5

Description

Kutaa darbee keessatti yeroo lolaa fi sodaa haala munaafiqotaa ilaalle turre. Achirraa itti fufuun haala isaanii xumuraa ni ilaalla:

Amaloota Munaafiqootaa

Lola Irraa Dheessu

Kutaa darbe keessatti munaafiqonni sababa adda addaa dhiyefachuun dirree lolaa irraa dheessaa akka turan ilaalle jirra. Dirree lolaa irraa dheessun isaanii kuni ajala (yeroo du'aa) isaanii akka hin tursiisnee fi umrii saanii hin dheressinee Rabbiin subhaanahu wa ta'alaa ni beeksisa:

قُلْ لَنْ يَنْفَعَكُمُ الْفِرَارُ إِنْ فَرَّتُمْ مِّنَ الْمَوْتِ أَوْ أَلْقَتِلِ وَإِذَا لَا
تُمْسِعُونَ إِلَّا قَلِيلًا

١٦

Jedhi, “Du'a yookiin ajjeechaa irraa yoo dheessitan, dheessi isin hin fayyadu. Yoosan, xiqqoo malee hin qananiisifamtan.” Suuratu Al-Ahzaab 33:16

Yaa Nabiyyicha munaafiqota kanniininakkana jedhi: du'a ykn ajjeecha sodaachun dirree waraanaa irraa dheessun isin hin fayyadu. Dhugumatti, kuni ajala (yeroo du'aa) keessan hin tursiisu. Yoo dheessitan, addunyaa tana keessatti hamma umrii isaaniiif murtaa'etti malee hin qananiisifamtan.[\[1\]](#) Hanga yeroo isiniif murtaa'etti addunyaa tanatti akka fayyadamtan isiniif hayyamama. Ergasii, wanti isin irratti murtaa'e ni dhufa. Innis du'a.

Tarii dhimma isa fayyadu ykn fayyadu hin dandeenyef jedhe namni lola isarratti dirqama ta'e dhiisu keessa faayda maaltu jiraa? Tarii osoo dirqama kana irraa garagalee deemu yeroma san du'uu danda'a. Yookiin immoo turee umrii isaaaf dheeratu danda'a. Garuu osoo turee fi umrii isaa dheerate, abadii (zalaalamii) ni turaa? Lakki. Xiqqoo malee hin tursiifamu. Hanga fedhe yeroon isaa haa dheeratu, dhugumatti baay'ee xiqaadha.

Kanaaf, Aakhiran yommuu wal bira qabamtu addunyaan homaayyu miti. Rabbiin olta'aan ni jedha:

﴿ بَلْ تُؤْثِرُونَ الْحَيَاةَ الدُّنْيَا ١٦﴾ وَالْآخِرَةُ خَيْرٌ وَأَبْقَى ١٧﴾

“Garuu jirenyaa addunyaa filattu. Aakhiraan caaltuu fi irra turtuu taatee osoo jirtuu.” Suuratu Al-A'ala 87:16-17

Yaa namoota! Faaya fi miidhaginna addunyaa qananii Aakhiraan caalchiftu. Gandi Aakhiraan addunyaa caalaa gaarii fi yeroo hundaa turtuu tan taatedha.

Nabiyyiin sallallahu aleih wassallam akkana jechuun beeksiisan:

“؟ ？？？？？？ ？？？？ ？？ ？？？？？？ ？？？？ ？？？ ？？？？？？ ？？？ ？”??..?

“Jannata keessatti bakki alangeen qabattu gahuu addunyaa fi wanta ishii keessa jiru hunda caala.” [Sahih Al-Bukhaari 6415](#)

Yeroo Aakhiratin yommuu wal bira qabamu addunyaa keessatti wanti itti fayyadaman homaayyu miti. Kanaafi Rabbiin ni jedha: “**Yoosan, xiqqoo malee hin qananiisifamtan.**”

Kunoo asitti wanti biraa ni jira:osoo ajjeefamaniyyuu karaa Rabbii keessatti waan ajjeefamaniif isaan jiraattota ta'u. Rabbiin olta'aan ni jedha:

وَلَا تَقُولُوا لِمَنْ يُقْتَلُ فِي سَبِيلِ اللَّهِ أَمْوَاتٌ بَلْ أَحْيَاءٌ وَلَكِنْ لَا

١٥٤ شُرُوت

“Namoota karaa Rabbii keessatti ajjeefaman “warra du'aaniidha” hin jedhinaa. Kana irra, isaan jiraattota, garuu isin hin beektan.” Suuratu Al-Baqarah 2:154

Kuni arrabaan jechuu irraa dubbii dhoowwamneedha. Inumaa qalbiin, “Isaan warra du'aniidha.” jennee yaadu irraa ni dhoowwamne. Rabbiin olta'aan ni jedha:

وَلَا تَحْسِبَنَّ الَّذِينَ قُتِلُوا فِي سَبِيلِ اللَّهِ أَمْوَاتًا بَلْ أَحْيَاءٌ عِنْدَ رَبِّهِمْ

١٦٩ يُرْزَقُونَ

“Kanneen karaa Rabbii keessatti ajjeefaman, du'aa akka ta'anitti hin yaadinaa. Kana irra, isaan jiraattota Gooftaa isaanii biratti sooramaniidha.” Suuratu Aali-Imraan 3:169

Namni karaa Rabbii keessatti ajjeefame du'aa akka ta'etti dubbachuunis ta'e yaadun hin hayyamamu. Kana irra, inni qaaman kan du'eedha. Garuu jirenyaa barzakha ruuhiin jiraata. (Ruuhiin isaa qaaman erga addaan baate booda jirenyaa barzakha ni jiraatti.) Jirenyi barzakha akka jirenyaa addunyaati miti. Osoo akka jirenyaa addunyaa ta'e silaa namoota kanniin awwaaluun hin hayyamamu ture. Osoo isaan akka jirenyaa addunyaa kan jiraatan ta'ee ergasii nuti isaan awwaallee, silaa isaan kan ajjeesne fi balleessinee

taana.[\[2\]](#) (Barzakha jechuun du'aa fi Guyyaa Qiyaamaa jidduu wanta jiruudha. Namni du'e Barzakha keessa seenee jira. Hanga Guyyaa Qiyaamaa kaafamu Barzakha keessa tura.)

Ergasii itti aanse Rabbiin olta'aan ni jedhe:

قُلْ مَنْ ذَا الَّذِي يَعْصِمُكُمْ مِّنَ اللَّهِ إِنْ أَرَادَ بِكُمْ سُوءًا أَوْ أَرَادَ بِكُمْ رَحْمَةً
وَلَا يَجِدُونَ لَهُمْ مِّنْ دُورِ اللَّهِ وَلِيَأَوْلَانَصِيرًا

١٧

“Hamtuu yoo isinitti fedhe yookiin rahmata isiniif fedhe Rabbiin irraa kan isin eegu eenyudhaa? Rabbiin ala ofiif tiksaa fi gargaaraa hin argatan.” Suuratu Al-Ahzaab 33:17

Badiinsa ykn moo'atamu isinitti yoo fedhe, eenyutu Rabbiin irraa isin eegaa? Deebiin: eenyullee hin danda'u. Yookiin yoo Rabbiin rahmata isiniif fedhee eenyutu waan badaan isin tuqaa?

“Rabbitin ala ofiif tiksaa fi gargaaraa hin argatan.” Namoonni lola irraa dheessan kunnin Rabbitin ala kan isaan fayyadu ykn waan gaarii isaaniif fidu ykn miidhaa isaan irraa deebisu hin argatan. [\[3\]](#)

Namoota Waan gaarii irraa nama gufachisanii fi duubatti harkisan Rabbiin ni beeka

قَدْ يَعْلَمُ اللَّهُ الْمُعَوِّقِينَ مِنْكُمْ وَالْقَابِلِينَ لِإِخْوَنِهِمْ هَلْمَ إِلَيْنَا وَلَا يَأْتُونَ

الْبَاسَ إِلَّا قَلِيلًا

“Isin keessaa kanneen gufachiisanii fi kanneen obboleeyyan isaaniit in “Gara keenyaatti koottaa” jedhan Rabbitin beekee jira. Xiqqoo malee lola hin dhaqan.” Suuratu Al-Ahzaab 33:18

Karaa Rabbii irraa warroota namoota biroo duubatti harkisanii fi warroota obboleeyyan isaanitiin, “Gara keenya koottaa nutti dabalamaa, Muhamadin dhiisaa, isa waliin lola irratti hin argaminaa, dhugumatti du'a isaatiin du'a keessan isiniif sodaanna.” jedhan, dhugumatti Rabbitin ni beeka. Isaan ijannoo laamshessuu waliin yeroo xiqqoo malee gara lolaa hin dhufan. Xiqqoo tanaayyu na argaa fi na dhagayaaf dhufu.[\[4\]](#)

Yeroo sodaan dhufu ijji naanna'uu fi yeroo sodaan deemu arraba qaraan nama waraanu

شَحَّةٌ عَلَيْكُمْ فَإِذَا جَاءَ الْخُوفُ رَأَيْتُهُمْ يَنْظُرُونَ إِلَيْكَ تَدْوُرُ أَعْيُنُهُمْ كَالَّذِي
شَفِىَ عَلَيْهِ مِنَ الْمَوْتِ فَإِذَا ذَهَبَ الْخُوفُ سَلَقُوكُمْ بِالْسِنَةِ حِدَادٍ أَشِحَّةً عَلَىٰ
نَيْرٍ أُولَئِكَ لَمْ يُؤْمِنُوا فَأَحْبَطَ اللَّهُ أَعْمَلَهُمْ وَكَانَ ذَلِكَ عَلَى اللَّهِ يَسِيرًا ﴿١٦﴾

“Isin irratti doy’oota ta’ani. Yommuu sodaan dhufu, du’a irraa kan ka’e akka nama gaggabeetti ijji isaanii naanna’uun gara keetitti kan ilaalan ta’anii isaan argita. Yeroo sodaan deeme immoo kheeyri irratti kan haafayan ta’anii arraba qaraan isin waraanu. Isaan suni hin amanne. Kanaafu, Rabbiin hojiiwwan isaanii jalaa balleesse. Kuni Rabbiin irratti salphaadha.” Suuratu Al-Ahzaab 33:19

Munaafiqonni nafsee isaanii keessa diinummaa fi jibbummaan, jirenya tana jaallachuu fi du’a jibbuun waan jiruuf isin irratti qabeenyaan, nafseen, humnaa fi jaalalan, doy’oota. (Isin waliin loluuf qabeenya hin baasan, humnaa fi nafsee ofii hin wareegan. Do’ya jechuun nama wanta tokko qabatuudha.) Yommuu lolli argamu, du’a sodaatu. Ajjeechaa sodaachuu fi dheeessu irraa kan ka’e aqliin isaanii waan deemeef, ijji isaanii akka ija nama duuti itti dhufte naannooftu naannooftu taate gara kee kan ilaalan argita. (Munaafiqonni waraana irraa garmalee sodaachu irraa kan ka’e ijji isaanii akka ija nama du’uu hedu naannofti. Yommuu sodaan dhufu ijji isaanii ni jijjiramti, haalli isaaniis ni jijjirama)

Yommuu lolli dhumatee fi sodaan qabbanaa’e, arraba qaraa nama rakkisuun isin waraanu. Yeroo boojin qoqqoodamu warra doy’ooman, hinaafanii fi haafayan ta’anii isaan argita.[\[5\]](#) Qataadan ni jedha: Boojii biratti namoota hunda caalaa kan haafayan, qooda badaa qaban, “nuuf kennaa, nuuf kennaa, isin waliin [lola irratti] argamnee jirra.” Jedhaniidha. Yeroo lolaa immoo hunda caalaa dabeessotaa fi haqa gargaaru kan dhiisaniidha.”

Isaan kana waliinu kheeyri (waan gaarii) irratti doy’oota. Kana jechuun isaan keessa kheeyrin hin jiru. Isaan lugnummaa (dabeessummaa), kijibaa fi xiqqeenya kheeyri walitti qaban. Kanaafi ni jedhe: **“Isaan suni hin amanne. Kanaafu, Rabbiin hojiiwwan isaanii jalaa balleesse. Kuni Rabbiin irratti salphaadha.”**[\[6\]](#)

Aayah tana irraa barnoota baratamu:

- Munaafiqonni warra doy’ooman, haafayani fi dabeessota ta’aniidha.
- Ammas, munaafiqonni jirenya addunyaa garmalee akka jaallatan ni argina. Sababni isaan sadarkaa sodaa ol’aaanaa kana irra gahaniif jirenya tanaaf waan haafayanii fi waraanan du’uu waan sodaataniifi.
- Sodaan erga deeme booda munaafiqonni dubbiin gootota. Yeroo lolaa fi rakkoo immoo hundaa caalaa dabeessota.
- Munaafiqonni mu’mintoota irratti garmalee gara-jabaattota ta’uu. **“Arraba qaraatin isin waraanu”** jedhu keessatti ni arganna.

- Rabbiin subhaanahu wa ta'aalaa wanta qalbii keessa jiru ni beeka. "**Isaan suni hin amanne.**" Kana jechuun qalbii isaanitiin hin amanne. Nuti gubbaadhaa akka amananitti beekna. Garuu dhugaadhaan isaan hin amanne. Kanaafu, kuni Rabbiin wanta qalbii keessa jiru akka beeku agarsiisa.
 - Amaloota munaafiqonni ittiin ibsamani kanniin irraa of eegu.
 - Keessaanis ta'ee alaanis ta'ee kufriin hojiin akka baduuf sababa ta'a. ragaan kanaa: "**Kanaafu, Rabbiin hojiwwan isaanii jalaa balleesese.**"^[7]

Yeroo Rakkoo Muslimoota irraa dheessun fageenya irraa odeefannoo argachuuf jaallachuu

﴿يَحْسَبُونَ الْأَهْرَابَ لَمْ يَذْهَبُوا وَإِنْ يَأْتِ الْأَهْرَابُ يَوْدُوا لَوْ أَنَّهُمْ بَادُونَ فِي
الْأَعْرَابِ يَسْأَلُونَ عَنْ أَنْبَاءِكُمْ وَلَوْ كَانُوا فِيْكُمْ مَا قَتَلُوا إِلَّا قَلِيلًا ﴾٦٠﴾

“Ahzaab (gareen diinaa gamtooman) hin deemnee yaadu. Ahzaab yoo dhufan, jiraattota baadiyaa waliin baadiyaa keessa ta’anii oduu keessan irraa gaggaafachuu jaallatu. Osoo isin keessa ta’aniillee, xiqqoo malee hin lolan.” Suuratu Al-Ahzaab 33:20

Munaafiqonni Ahzaaba Rabbiin moo'anna badaa moo'ate akka hin deemnetti yaadu. Kunis ciminna sodaa fi dabeeessummaa irraa kan ka'eedha. Osoo Ahzaab gara Madiinaa deebi'anii, silaa munaafiqonnii kunniin Madiinaa irraa fagaachuun jiraattoota baadiyaa waliin baadiyaa keessatti ta'uuhawwu. Fagoo irraa oduu keessan iyyaafatu, gaggaafatu. "Muhammadi fi sahabonni isaa badanii jiruu?" jedhanii namoota gaggaafatu turan.

Baay'inna lugnummaa, gadi xiqqeenyaa fi dadhabbinna yaqiina isaanii irraa kan ka'e osoo isin keessa ta'aniyyu xiqqoo malee hin lolan.^[8]

Guduunfaa

Keeyyattooni armaan olii lolaan kan wal qabatanii fi haala munaafiqoota ifatti kan baasaniidha. Namni tokko keeyyattoota kanniin bu'uura godhachuun, "Korona jalaa dheessun du'a jalaa nama hin baas" jechuun of eeggannoobarbaachisu yoo hin godhin, dogongora keessa seena. Kaayyoo shari'aa Islaamaa keessaa tokko: balaa guddaa hawaasa irra gahuu deebisuu fi too'achudha. Koronaan dhibee hawaasa miidhu waan ta'eef namni of eeggannoogochuu fi qajeelfamota ittisa dhibee hordofuu qaba. Kana yommuu godhu immoo akka munaafiqota armaan olii sodaa cimaan guuttamu hin qabu.

Gama biraatin, aayaatni armaan olii jajjabeenya akka qabaannu, obsinu fi du'aaf of qopheessun nu taasisu. Eeti, koronaa jalaa dheessun du'a jalaa nama hin baasu. Chaayina irraa dheessanii warri Ameerikaa fi Awrooppaatti galan, amma haalli isaani akkami? Yeroo kanatti hadiisa Rasuulaa (SAW) armaan gadii kana hojii irra akka oolchan nama taasisa:

“Lafa (biyya) takka keessatti dhibee weeraraa yoo dhageessan, [biyya san] hin seeninaa. Osoo isin achi keessa jirtanu biyya takka keessatti yoo argame immoo, ishii (biyya san) keessaa hin bahinaa.

“[Sahiih Al-Bukhaari 5728](#) (Himni jalqabaa dhibee weeraraa kan akka koronaa irraa of eeggannoo akka goonu, himni lammataa immoo akka obsinuu nuuf dhaama.)

Ammas, namni bakka dhibeen weeraraa itti ka’etti, obsee fi mindaa Rabbiin irraa abdachuu biyya san keessa turee, ergasii yoo du’e, mindaa shahiidatu isaaf jira. (Ilaali [sahiih Al-Bukhaari-5734](#))

Kitaabban wabii:

- [1] Tafsiiru Muyassar-420
- [2] Tafsiiru Al-Qur'aanil Kariim-Suuratu Al-Ahzaab-Ibn Useymiin-fuula 131-132
- [3] Madda fuula 137-138
- [4] Tafsiiru Muyassar-420
- [5] Madda olii
- [6] Al-Misbaahu Al-Muniir fii zahziib Tafsiir Ibn Kasiir-1121
- [7] Tafsiiru Al-Qur'aanil Kariim-Suuratu Al-Ahzaab-Ibn Useymiin-fuula 151-153
- [8] Tafsiiru Muyassar-420, Tafsiiru Xabarii-19/57

Date Created

April 8, 2020

Author

admin